

四庫全書

集部

欽定四庫全書

集部

柯山集卷一至四

詳校官庶吉士臣汪彥博

檢討臣何思鈞覆勘

總校官進士

臣程嘉謨

校對官學錄

臣常循

謄錄監生

臣高憲曾

作柯山集一百卷茲集卷數半之案查慎行
注蘇軾詩云嘗見未詩二首而今本無之考
周紫芝太倉梯米集有書譙郡先生文集後
曰余頃得柯山集十卷於大梁羅仲洪家已
而又得張龍閣集三十卷於內相汪彥章家
已而又得張右史集七十卷於浙西漕臺而
先生之製作於是備矣今又得譙郡先生集
一百卷於四川轉運副使南陽井公之子晦

欽定四庫全書

集部三

柯山集

別集類二 宋

提要

臣等謹案柯山集五十卷宋張耒撰耒有詩說已著錄蘇軾嘗稱其文汪洋冲澹有一唱三嘆之音晚歲詩務平淡效白居易樂府效張籍故瀛奎律髓載楊萬里之言謂肥仙詩自然肥仙南宋人稱耒之詞也文献通考

之然後知先生之詩文為最多當猶有網羅之所未盡者余將盡取數集削其重複一其有無以歸於所謂一百卷以為先生之全書云云然則末之文集在南宋已非一本其多寡亦復相懸此本卷數與紫芝所記四本皆不合又不知何時何人摭拾殘剩所編宜其闕佚者頗夥然考胡應麟筆叢有曰張文潛柯山集一百卷余所得卷僅十三蓋鈔合類

書以刻非其舊也余嘗於臨安僻巷中見鈔
本書一十六帙閱之乃文潛集卷數正同明
旦訪之則夜來鄰火延燒此書條煨燼矣余
大悵惋彌月云云此本雖不及百卷之完備
然較應麟所云十三卷者則多得已不啻數
倍亦足見未著作之大略矣乾隆四十九年

十一月恭校上

總纂官臣紀昀臣陸錫熊臣孫士毅

總校官臣陸費墀

提要

卷之三

欽定四庫全書

柯山集卷一

宋 張耒 撰

賦

大禮慶成賦

惟宋六世皇帝踐祚之七年所以和同天人綏靜中外
垂鴻龍衣裕增高累厚以對於神祇祖考者固已蒙被充
塞光融翕赫六合一意四海一口無得而言矣粵以壬

申之仲冬將有事于南郊乃詔列位恪職賦事而有司
建言惟我國家因時施禮郊丘之位天地咸在牲幣並
薦禮樂合舉而古者乃以陰陽之至即南北之郊別位
殊時薦獻異數有司其何從于是天子惕然深思祇畏
敬慎曰茲大事我其敢專羣公卿士典禮之官竭思和
會以訂不易于是議者曰先王齊明以享帝而帝之享
否雖聖人末由知之惟受福者其享之占恭惟國家合
祭天地於茲六世矣惟我太祖躬膺駿命以遏亂略堂

皇二儀拓落八極以定萬世之業太宗威定宇內震蕩
大漠以一丸有定天下於一尊真宗熙洽富盛符瑞委
積南牧之旅不戰請命威加北荒奏功岱宗仁宗席安
據厚不動指顧孽獫猾羌含毒內向吏士未頓藏竄屈
伏終始太平垂五十年英宗入纂百姓興能神考有為
六服承德此可謂受天地之福矣然則神祇之安吾享
也其久哉于是天子乃翳青雲之屋乘雕玉之輿應龍
受轡招搖翼輔建虹霓之修竿兮颺彗星之飛游太一

執節以先驅兮二十八星拱手布武經營而周游貌貅
六師雷霆萬乘初海沸而雲涌忽山峙而川靜蓋天子
粹然玉溫健然天運望宮門而動色顧執策而命進惟
烜赫之靈源兮寶算祖於神明覽光德而來降兮館玉
宇之嚴清張咸英之廣樂備千籥之盛舞景光交徹鸞
鶴來下神嬉靈豫醉爵飽俎翼翼清廟觀德之宮七聖
在天時降於宗世有哲孫豈弟無疆惠我文人原此下
脱四

在位望而含辛齋暘告旦祥飈掠塵從我髦士來祇精
禋御史肅吏司馬飭兵既逶逶遲遲雲流而日行兮又
洶洶業業海運而天聲靈旂洪順翕赫欵霍兮攫擎龍
虎而亂鯢鵬雄驚憺威而震伏兮柔良化禮而肅清弛
天威戢天戈兮固已熄威蚩尤而折櫨槍執飛廉圉商
羊屬之有司矣羲和磨刮披拂盡獻其光明益傾都空
閭翹首跂足俯窺履綦傍覘佩玉者忽焉不知手之加
額口之成祝也于是背都城望帷宮郊垌坦其迤邐兮

場圃既寒而畢功頽青雲以連屬染紅霓之經緯紫微
下屬於兩觀勾陳錯施於萬雉扶傾之神仰立而拱翔
德之龍下視而曳疑神變之歛成兮涌九地而出峙連
廡千柱廣殿萬杙飛甍闢桷洞牖屹壁酸股之隅眩目
之極唐洛執箕而莫計班倕操斤而自惑者類非資才
於斲墁而皆機杼之紡績也一室之用足以溫一家一
宮之費何啻衣一國驚霆之蹕既震沟壑之聲咸寂敝
齋寢之靜深兮何清虛而邃密天子方端儼而虛一多

儀未舉精意已塞甲夜始晦嚴鼓再作飛斂走伏神讐
鬼愕望舒騰精以燭宵兮玄冥收威而布德靈鼉五震
軫車將中天子乃披袞執玉兮齋明莊肅之誠動于進
趨表於形容干燎具揚萬炬畢融上揜熒惑旁爍燭龍
近為朝暘遠為融風赫赫曦曦煌煌輝輝列次之士野
屯之師歸如酌醇醪而御薰衣黃流汪洋璧玉照徹祥
祲衡布協氣下浹音為樂和形為人悅白質之獸簫聲
之鳥紛披雜沓應奏而舞節陟降既周燎烟始升奔星

走虹奉璧薦牲豐隆奔馳而仰騫兮祝融焜煌而上征
開闔闔兮闢清都后帝燕兮百神愉圓錫蓋兮方獻輿
岳輸固兮溟渤濡于是禮備樂成整車而旋萬類環極
端門闢天賞出千庾恩流百川北包大壤南盡島蠻西
越流沙東窮海壘令未脫口雷運風傳野無窮人獄無
宿愆破械解縲負帛囊錢車反其舍士復其伍効技呈
才千鐘萬鼓天子舉酒以屬羣公咸曰休哉天子之功
系曰於穆聖王建皇極兮嚴恭精禋帝來格兮柔祇並

位儼牲璧兮文祖在坐臨有赫兮於惟祖宗有常則兮
諱兵畏刑後貨食兮政有損益茲不易兮帝則鑒之哉
穀錫兮兢兢業業日一日兮三載一祀年萬億兮

游東湖賦

紛不知吾之所如兮獨漫漫而若狂乘醉飽之餘力兮
遂陟巘而緣岡惟大冬之栗烈兮莽川澤之茫茫農功
休乎場圃兮平陸散夫牛羊憫大木之百圍兮慘赤立
而無裳鶴鶴羣鳴而下上兮雜篁竹之青黃忽平陸之

既窮兮漸積水之汪洋曰是為齊安之東湖兮右派合
乎濤江荒灣寂寥而葭葦兮懸疏眉于夕陽為舉網而
無獲兮嘉魚逝而洋洋弔村落之柴荆兮哀淮夷之陋
荒呼徒侶而還歸兮陰風振而塵颺畏星昴之將中兮
冒玄夜之飛霜顧謂童子汝其賦詩爰有小子哀然致
詞歌曰歲窮木落兮大澤空雁宵征兮天北風曷不飲
酒兮御玄冬歸來歸來兮樂未終余曰汝歌置之乃歌
曰臨山川兮懷故鄉歲窮陰兮晝不暘升高堂兮潔余

樽耿余思兮古之人

問雙棠賦

自序

雙棠者予寓陳僧舍堂下手植兩海棠也始余
以丙子秋寓居宛邱東門靈通禪刹之西堂是
歲季冬手植兩海棠於堂下至丁丑之春時澤
屢至棠茂悅也仲春且華矣余約常所與飲者
且致美酒將一醉於樹間是月六日予被謫書
治行之黃州俗事紛然余亦遷居因不復省花

到黃且周歲矣寺僧書來言花自如也余因思
茲棠之所植去余寢無十步欲與隣里親戚一
飲而樂之宜可必得無難也然垂至而失之事
之不可知如此今去棠且千里又身在罪籍其
行止未能自期其於棠未遽得見也然均於不
可知則亦安知此花不忽然在吾目前乎因賦
問棠以自廣云

寓舍之壤既膏且腴手植兩棠于堂之隅風來自東冰

雪融液興視吾棠既葩而澤乃沾我酒又命我人期一
醉於樹間聊快酬於芳春夾鍾之初謫書在門陸走千
里止於江濱天星一周穆然舊春想見吾棠粲然含姿
俯睨舊棠今居者誰宛如怨而有待淡無言其若思嗟
乎始種自我其享將獲盈我旨酒會我賓客一酌未舉
俯仰而失事至而驚其初孰測惟得與失相尋無極則
亦安知夫此棠不忽然一日復在余側也且夫棠得其
居愈久愈敷無有斧斤斲傷之虞我行世間浮雲飛蓬

惟所使之何有南東夫以不移俟彼靡常久近衡從其志必償歌以訊之用著不忘

柯山賦

入東門而右回兮原迤靡以相屬拔磅礴以陸起兮是為柯山之麓其上蕭森而掩靄兮冠萬竿之修竹下礲確而堅密兮拱高林與喬木散雞犬于危阨兮雜茅茨與夏屋通樵牧之蹊逕兮路縱橫而斷續撮土石列暗竇谷虛鳴鳥上下伏獸號呼俯江流之蕩潏招列山之

蟠紝林巒作態而蔽虧兮風雲効技而卷舒固可以開
闔陰陽于一氣寅餞日月於天衢爰有窮人癯然無歸
曠四海無所投其足兮后帝命我于山之隈庇蓬茅之
數椽兮撫枵腹而常飢時醉飽而自得兮亦杖履而遨
嬉逾山而東席門草藩爰有君子于茲考槃自種自食
隣里莫不圖書滿家兒稚飢寒相見輒喜有時不冠寄
萬事于一笑兮不知食糲而衣單吾不加物以一毫兮
亦莫受人之燠暄悟紛華之多虞兮幸寂寞之至安飲

我薄酒惟有餘啜我豆羹甘而腴隱几而休讀我書乃
曳杖歌曰升柯之巔明遠眺兮策柯之崦可以老兮終
古不忒天之道兮于于而行無喪吾寶兮

夕飲賦

張子晨起落然四壁千林霜曉四顧寒寂先生憫然而
不自得顧視壁間若有物焉短脰魁腹兮長喙旁啄而
椎髻上直也雖未知其何祥而津津然有喜色矣于是
童子趨而進曰是有客曰麌生者願奉先生于頃刻先

生欣然三揖而進之蓋其氣盎盎冽而浮兮其聲瀏瀏
和而幽兮其質醇醇毅以柔兮先生曰甚矣予之不敏
也今日乃知從子之遊于是體之栗然寒者溫心之鬱
然結者散已大忘於寒暑尚何有于夜旦揖麴生而告
之曰吾將旦旦與君周旋既尊君以良辰又餞君以芳
鮮而可乎麴生對曰斥子之泉吾泉出兮枵吾之腹君
腹實兮陋彼昏之獻嘲何啻富于于一日

鳴雞賦

先生間居學道昧旦而興家畜一雞司晨而鳴畜之既老語默有程意氣武毅被服鮮明峩峩朱冠丹頸玄膺蒼距矯攫秀尾翹騰奉職有恪徐步我庭啄粟飲水孔肅靡爭山川蒼蒼風霰宵凝黯幽牕之沉沉悅余夢之初驚萬里寂鐘鼓無聲聞振衣之膈膊忽孤奏而冷冷委更籌之離亂和城角之淒清應雲外之鳴鴻弔山巔之落星歌三終而復寂夜五分而既更萬戶皆作車運馬行先生杖履而出觀大明之東生

暑雨賦

提九山於空虛忽並擊而俱烈壅百川於河漢乃防隕
而一決哀下上之微生何足拱夫推折方朱鳥之宵中
歲仲夏兮天熱雖惔焚之一快俄鬱蒸之莫洩叢百指
於環堵顧杖履之安設委熏風於九旬淫疾苦于百節
付六鑿於渾沌獨天游而神悅忽翛然而輕舉固已窺
寒門而蹈冰雪攬北斗而酌天酒觀上帝於玄闕聊逍
遙兮窮年俯故土兮螻蛭

蘆藩賦

張子被謫客居齊安陋屋數椽織蘆為藩疎弱陋拙不能苟完畫風雨之不禦夜穿窬之易干上難栖之蕭瑟下狗竇之空寬先生家貧一裘度寒曾肱篋之不卹何藩籬之足言鼓鐘于宮聲出於垣中空然而無有徒望意而輒還故吾守此敗蘆其固比夫河山若夫朝暘不出微靄既零聲如跳珠淅浙可聽及夫衡門暮掩鳥雀就栖挂荒山之落景絡衰蔓之離離其下榛草樵蘇往

來蟠蚓出入羊牛覘窺先生跔然杖藜過之瞻顧四隅
憫然歌之曰公宮侯第兼瓦連甍紫垣玉府十仞塗青
何嘗知淮夷之陋俗窮年卒歲乎柴荆也哉

燔薪賦

歲暮苦寒烈風不休先生家貧衣無重裘讀書夜闌爐
炭已灰先生瑟縮淒然不怡顧謂童子與薪偕來童子
把薪而來曰是薪也陳之壁間自春徂冬風日所燠埃
塵所蒙固瀟夜之乾竭乃外槁而中空唯利簇燔無所

獻功與火相得赫然大烘堅杵勁節久而後燃後羣枯
而効技又熒熒而不烟于是先生欣然環坐皆喜或裸
股赤足或引手張臂窮谷蕭條薪炭如土益取之而不
竭顧此樂之甚富又何必琴材修直獸材攫搏漢辟之
椒效煖魏宮之金辟寒誰知空山寒夜之叟敢傲溫于
狐貉之前

原注令供上方炭率斷成
琴材胡桃文鵝鴨之色

杞菊賦

予到官之明年以事之東海道漣水連水令盛

僑以蘇子瞻先生後杞菊賦示予予不達世事自初得
官即不欲仕而親老矣家苦貧甚升斗之粟以紓其朝
夕之急然到官歲餘困于往來奔走之費而家
之窘迫益甚向日悲愁歎嗟自以為無聊既讀
後杞菊賦而後洞然如先生者猶如是則予而
後可以無嘆也

有蓬四垣張子居官童子晨謁有駒在門張子迎客平
生故人予致其勤餽客以飧擷露菊之清英翦霜杞之

芳根芬敷滿前無有馨羶客愠而作謂余曷然張子始歎終笑以言陋雖爾棄分則余安子聞之乎膠西先生為世達者文章行義徧滿天下出守膠西曾是不飽先生不愠賦以自笑先生哲人大守尊官食若不厭况于余焉不稱是懼敢謀其他請卒予說子無我嗟冥冥之中實有神物主司下人不問毫髮夫德不稱享者殃勞不稱費者罰予身甚微余事甚賤聊逍遙于枯槁庶自遠于人患客謝而食如膏如飴茲山林之所樂予與爾

其安之

涉淮賦

涉清淮之浩蕩兮聊以豁吾之幽憂轉峽石而下泛兮
觀波濤之複流何佛廟之巍峨兮隱于兩山之幽眺東
崖之飛閣兮納萬里之清秋昔淮人之倔強兮恃江左
而不賓方中原之多故兮遂竊帝而稱隣遭世宗之勃
興兮乘累聖之威神盡疾馳而奉命兮戈一揮而遂臣
始盤桓于壽春兮益嘗挫而益振驅貔虎於順流兮

臨長江之廣津馳千里之玉帛兮擁百萬之精軍計其
一時之氣兮固叱咤而風雲嗟百年之幾時兮山川儼
其如新忽人事之幾變兮撫墟廟而涇淪訪遺事於樵
夫野人之談說指餘迹于荒城故壘之荆榛徒見夫雲
悠悠而朝出水漠漠而東流飛沙鷗于晴渚聽夜鶻于
行舟彼時豪盛此日廢昔人功業令人愁嗟夫旦之心
暮不可求前之迹後不可再胡為寂寥之前古乃以興
亡而感慨雖物至盛者其存也宜久勢極大者其亡也

可驚方登臨而遠想宣獨予兮忘情

後涉淮賦

甲寅之秋自正陽涉淮作涉淮賦既至泗之臨淮邑之東南皆淮也朝游夕濟凡淮之驚畏風濤之變無不厯之矣今秋又以事之東海至漣水入漣河舟人告予曰淮水自是入海矣予生二十有二年吳楚秦蜀之國來往殆遍竊悲其跡之不常作後涉淮賦以自廣云

浩淮流之湯湯兮蕩余身以沿洄嗟我居之不常兮未
期歲而再來始進棹于正陽兮睨下蔡之窮城界陳許
之北壤兮望荆塗之兩山緬川原之迴複兮思禹功而
慨然爰係舟于徐邑兮浸淮隅之兩墉駕長帆于朝風
兮凌星河于夜湍豈所覽之未周兮恨未窮其本源忽
行役而南去兮稅吾轡于清漣指溟渤于西北兮曰此
淮流之所還彼百川之歸海兮吾固知其必然惟循源
而極末兮哀予迹之未安當天時之晚秋兮風露慘其

既至山峭峭而瘦出兮水紺潔而無滓曳孤篷而忽驚
兮出游鱸于短葦白鷺飛而下來兮翩如避世之君子
酒芳香而盈盃兮吾陶陶而日醉方頽然而遺形兮孰
卑高而賤貴彼貴者樂其府兮富者懷其資無二者之
累予兮何羈游之足悲窮天下之奇觀兮極覆載之所
藏膏吾車而勿反兮畢吾世而徜徉

雨望賦

談海天之蒼茫觀驟雨之霧沛飄風擊而雲奔曠萬里

而一蔽卒然如百萬之卒赴敵聚戰兮車旗崩騰而矢
石亂至也已而餘飄既定盛怒已泄雲逐逐而散歸縱
橫委乎天末又如戰勝之兵整旗就隊徐驅而回歸兮
杳然惟見夫川平而野闊夫雲霞風月之容雷雨電雹
之變非巧力之能為蓋人間之絕觀必也登雄樓傑閣
之崢嶸憑高山巨海之空曠徹除耳目之障蔽而後能
窮極變化之奇狀嗟我居之卑湫兮東觀聽于尋丈顧
所欲之莫得兮徒臨風而惆悵

暮秋賦

嗟予志之莫就兮哀天時之不予以謀歲冉冉以將暮兮
無以蕩吾之幽憂昔吾之既有知兮獨信道而不顧鞭
吾駒之不戒兮眇一世而獨驚儼章甫以自好兮安知
越人之異容恃所持之不欺兮謂彼此之情同夫何事
物之多故兮因少愚而老智彼善惡豈有常兮固繫夫
一世之賤貴或指礲以為玉兮人皆知其不然衆既訛
而莫返兮事隨信而名遷偽言實於衆舌兮至寶賤于

獨知正無助者必危兮惡乘朋而或濟決大河而東奔
兮挽予舟而上泝嗟爾檝之幾何兮蛟龍鬱其方怒外
既揆而內度兮考舊好之同異韜九襲以深藏兮固可
死而不可試卷杜衡之幽佩兮苞芳蘭之翠衣畏久畜
之不揚兮時竊陳以自戲怨所資之不售兮非達人之
宏規彼廢興之有命兮何憂樂之足係奏吾琴之憤怨
兮酌吾酒之冽清攬芳桂與秋菊兮聊以駐吾之頽齡
吾又將之夫深山兮遂絕世而遠去身九浴而後衣兮

齒三滌而後咀納冰霜於胸中兮蕩焦膈之宿汚求仙人
之奇術兮與彭咸乎為伍彼君子之蹈常兮曷急世之
有知聊逍遙以卒歲兮樂天命而不疑

柯山集卷一

欽定四庫全書

柯山集卷二

宋 張耒 撰

賦

超然臺賦

原注蘇子瞻守密作臺于圃名以超然
命諸公賦之予在東海子瞻令貢父來
命○

有序

或有疑于超然曰古之所謂至樂者安能自名
其所以然耶今夫鳥之能飛獸之能馳與夫人

之耳目手足視聽動作自外而觀之者豈不足
為大樂乎然鳥獸與人未嘗自以為樂也古之
有道者其樂亦然又安能自名其所以然耶彼
方自以為超然而樂之則是其心未免夫有累
也客應之曰吾豈以子之言非耶吾方有所較
而後知超然者之賢也予視世之賤丈夫方奔
走勞役守塵壤握垢穢嗜之而不知厭而超然
者方遠引絕去芥視萬物視世之所樂不動其

其心則可不謂賢耶今夫世之富人日玩其金
玉而樂之是未能富也忘其所有而安之是真
能富矣夫惟有之是以貴其能忘之使其無有
則將何所忘耶子以為將忘超然為真超然則
其初必有樂乎超然而後忘可能也子以為樂
夫世之樂者乎然則子亦安知夫名超然者果
非能至樂者也賦曰

登高臺之岌岌兮曠四顧而無窮環羣山于左右兮瞰

大海于其東棄塵壤之喧卑兮揖天半之清風身飄飄
而欲舉兮招飛鵠與翔鴻莽丘原之茫茫兮弔韓侯之
武功提千乘之富強兮憑百勝而稱雄忽千年而何有
兮哀墟廟之榛蓬有物必歸于盡兮吾知此臺之何恃
惟廢興之相召兮要以必歿而後止彼變化之無窮兮
嗟其偶存之幾何聊徼樂于吾世兮又安知夫其他或
有疑夫超然者兮豈其知道而未純曰彼天下之至樂
兮又安能自名其所以然惟樂而不知所以樂兮此其

所以為樂之全彼超然而獨得兮是猶存物我于其間
客有復之者曰子知至樂之無名兮是未知世之所可
惡世方奔走于物外兮蓋或至死而不顧眇如醯雞之
舞甕兮又似乎青蠅之集汙衆皆旁視而笑兮彼獨守
而不能去較此樂于超然兮謂孰賢而孰愚何善惡之
足較兮固天淵之異區道不可以直至兮終冥合乎自
然子又安知夫名超然者果不能造至樂之淵乎

鳴蛙賦

有序

予寓山陽學舍夏大雨屋四隅成塘聚蛙以千計聲鳴不絕夜為不能寐客有獻予以殺蛙之術曰投予藥一丸蛙無遺類矣童子將用之予曰不可復為賦示之

夏雨初至積潦過尺有蛙百千更跳互出幸此新霽夜月清溢我勞其休歸偃于室于時蛙鳴若嘯若啼若訴若歌若懼而悲若喜而語若怒而詬若嘯而噭若咽而嗽瘡者之呼吃者之鬪或急或緩或清或濁若羌絲野

鼓雜亂無節兮又似夫蠻歌獠語詭怪之迭作也爾其
困于泥潦失其所處而悲又若夫旱燠既久得其所處
而樂也爰有童子持燭來謁曰蛙羣夜鳴君寢其聒考
之周官洒灰驅蛤君其教之予得盡殺予語童子爾無
是酷爾樂而歌而哀則哭哭則悲嗟樂有聲曲聚語羣
爭引吭而呼一日之間不寧須臾蛙不汝嫌汝奚蛙誅
萬物一府誰好孰惡爾奚自私已厚蛙薄參通彼已樂
我自然弭爾怒心置燭而眠夜半張子援枕而吁顧謂

童子記吾言歟前言未究請卒吾說物各有時夫誰敢
過爾觀夫春露初靄朝華始敷文羽清喙飛鳴自如若
奏琴箏而和笙竽清耳悅心聽者為娛及夫陽春既徂
炎火將極惡草蕃遞淫潦濶積蛙于此時生養蕃息跳
梁號呼意氣橫逸子如之何時不可逆時乎時乎美惡
皆然當其盛時誰得而遷及其雪霜既降木實草衰飛
蠅聚蚊孽無所施于是此蛙歛吻收足偃然土中一聲
不出黨散巢披不可終日盛不可常興衰迭乘子姑忍

之奚以殺為哉

齊居賦

仲夏之月陰氣始至陽既盛而初剥陰浸亨而用事水
伏畏涸火燎方熾其于人也心竇過炎而腎受其弊惟
人之生受命在子推卦曰坎于行為水微陽所潛元氣
之始故火甚烈則正氣或因而衰則水受害者君子之所
深畏于是屏事燕息滌慮齋居既靜事以無刑又遠
眺而高居却紛華而弗陳與淡泊乎為徒絕嗜室慾愛

精晉神聲色不御滋味弗親冲然與和俱遊湛兮以道
合真故能體強志寧愉樂壽考遠去疾癘保此難老嗚
呼苟能推此以盡道攻此以察物則豈惟齋戒以御時
宜其顛沛而勿失且夫冰炭相乘利害交至隕真盜和
豈獨陰沴道心惟微易失難常困于侵陵有如微陽則
洗心潛慮以却外垢虛中保和以全天君故能涉至變而
而不濡更萬變而常存蓋將窮年以齊居豈特養生而
善身乎

蜘蛛賦

魚游假淵鳥棲求木而我所宅獨取諸腹巢于牆屋人不予以取朝蠅暮蚊食人所惡彼殘物以養而無益于世雖名人兮斯蟲是愧

得友賦

原注答
子邕

予趨世之僻迂獨子子而無朋信所樂以直前嘗媒仇而賈憎惟物態之多艱撫危心而自驚甘默默以退藏包薄技而無成何吾迹之不常旅成周之故京眷吾遊

之悠遠耿誰語兮吾情惟夫子之好修昔固聞乎德聲
獨顧我而忘勤握未煖而心傾發鍵鑰而不疑奏金石
之鏗鏗內端肅而粹溫外炳煥而清明嗟我鄙而子竒
謂欲合而莫能援古義而見交愧此意之何勝既兩盡
而莫疑亦交規而共評驅昔懣之無餘撫新樂而生矜
豈目前之懽愉實未得乎平生惟清洛之名都窺園沼
之清澄語寒堂之夜燭醉春圃之朝英徵逸事于古初
亦窮微而造精投明珠之的歷報美璧之煌熒惟此樂

之無窮使我愛日而兢兢雖所厯之萬殊願勿疾兮茲誠

懷知賦

嗟予生之苦艱涉世故而多違金羣嘲而衆侮獨子子其從誰嗟若人之好修外洵直而中竒挈予手而指津謂予車之不迷遵常度以夷行正六轡而安馳嗟終日而無禽曰固然而曷疑惟言動之合符若方圓于矩規振高言于皇極流餘麗于奇辭沃道德以相酬心厭清

而忘饑愛日月而畏別卒悠遠而多懷跂予望兮莫瞻
將駕言其從之何出門之多艱頓我馬以嗟咨山叢叢
而造天車欲進而畏摧臨江湖以浮舟蛟龍鬱其揚鬚
路幽迥而莫通心鬱塞而增悲贈瓊瑤以致情恐所托
之吾欺惟至技之難投或舉世而莫知倘一遇而見明
蓋至樂之無儻彼取舍之迷方或骨肉而相遺苟我心
之不察雖親愛而何恃故烈士之報知己或殺身而不
辭豈以生而易名誠內激而忘私風蕭蕭以戒秋蟬嘒

嘒而鳴悲白露團兮夕涼庭木颯其先衰羈我馬于東
周蓋三歲其子茲老駸駸而來逼心鬱鬱而不夷顧所
樂之莫從託宵寐兮庶幾酌尊酒以忘憂寫我心兮陳
詩

遺幽賦

居子子以無與兮出莫知其所之獨端居以終日兮耿
默默以長思古之人不可得而見兮存者滅畧之遺辭
顧一世之異情兮予誰者其從之惟我生之拙迂兮嗟

所慕之名竒挹庶清之遺風兮曰吾其進難而退易
驅不加于跬步兮却轡疾返而莫追踐斯言之不欺兮
庶吾心之無愧日月忽其遷流兮老忽忽而既來惟所
蹈之日迷兮撫前心而自非欲改故而圖新兮從靈龜
而問疑兆改橫而上從兮史為予而告辭橫為窒而善
處兮上從直達其無殲豈外拘而中泰兮或者既塞而
將遂保爾守而無變兮神明于汝其遺之相利害而為
術兮彼鄉人其猶耻美靈龜之告繇兮得我心之所止

彼躡躡其馬往聊安安以自恃歲冉冉以將老兮草木
颯其變衰玄蟬號乎高柳兮溢菡萏于清池宵蟲悲鳴
以相語兮朔雨振迅而南窺嗟吾客于東周兮周天星
之三移寫我憂以命駕兮憑高明以遠視覽平田以茫
決兮瞰清洛之東駁山重複而南積兮萬嶺矗矗以鱗
次微雲霽靄以忽布兮孤翼滅沒而高逝熊耳高高而
西峙兮女几奮湧而南危東平川于兩間兮散佃漁于
平地雞犬密其相聞兮溝塍布而如碁牛羊閒以就牧

兮烏鳥號呼以羣嬉登故國之餘墟兮望遺宮之頽基
傷者來世而無窮兮樂者昔人其既止惟達觀其超忽
兮等廢興于一視考物變以自樂兮遺餘情于酒醴大
人無即而非樂兮淺夫係物以自治彼方窘我以局促
兮我則顧步而廣肆制憂樂于在彼兮夫何貴乎明智
忘吾憂以洋洋兮將以語夫君子

哀伯牙賦

伯牙鼓琴後世無知我哀伯牙似智而愚天地之間四

方萬里知爾琴者一人而已鍾子既死其一又亡欲彈
無聽泣涕浪浪已奏已聞欲語不可逼塞滿懷無所傾
寫抑揚黃華巷歌里曲入邑娛邑入國悅國回視伯牙
面有矜色夫操至伎者必不和衆人之耳而媚衆耳者
又善工之深恥違衆者常子子其無與而冒恥者乃身
安而獲利則亦安知夫至藝之非禍而庸工之非祉也
嗟夫將為至巧者必無顧于終身之無與則至巧之于
人不祥之上器操不祥之器終身而不知則伯牙者乃

後世之深戒

石菖蒲賦 有序

歲十月冰霜大寒吾庭之植物無不悴者爰有瓦缶貯水斗許間以小石有草鬱然俯窺其根與石相結絡其生意暢遂顏色茂好若夏雨解籜之竹春田時澤之苗問其名曰是為石菖蒲也攷諸本草則所謂養性上藥仙聖之已試者也因賦之云

歲寒風霜水落石潔大木百圍僵仆摧折有草于此寸
根九節曾是莫傷葦然茂悅若處廣深隱奧密而不知
戶牖之外平地尺雪也將糜而餌之私其益于我躬則
不幾于奪也曷若致之吾前儀之以自修兮庶乎比德
之瑤玖也

病暑賦

皇昌運之元祀兮予出守乎清潁之區背國門而南驚
兮弭楫乎太昊之墟方炎夏之隆赫兮閔時澤之不濡

魃乘時而行虐兮盜威烈乎暘烏駕畢方而驂熒惑兮
回祿為其前驅燼所及于一燎兮何有瓦石與璠璵豐
隆致其微陰兮飛簾蕩覆而無餘野瞳瞳而揚塵兮何
蕭艾之芬敷應龍矯首于下澤兮僅自免于槁枯烏呀
嗟而忘飛兮獸逃穴而深居嗟人胡獨不能兮無乃欲
息而被驅昔蘄山之秋筠兮因冰卷而玉舒効功能于
么麼兮曾何足以寧吾軀飽風而為蜩兮又欲泳水而
為魚出寒泉于深井兮竭筋力于轆轤不計腹之所受

兮尚問山窮麌麥之有無亂曰陰陽循環靡窮極今時
至而變有常則兮融液金鐵爍山石兮謹視其報在朔
易兮陰大冬冰雪積兮無畏其機備其極兮補完裘
褐戒紡績兮保我歲寒以終吉兮

喜晴賦

積雨初止萬境聲乾星漢昭回夜容尚寒晨起載欣朝
暉在門起往從之清明肅然蚓安其穴蜩不遺涎遷開
通于滯濕失沮洳之墊昏列缺弭鞭豐隆偃麾羲和緩

轡而安行背扶桑而經天街顧大田之多荒乃愀然而
興哀聊雷霆之一嬉遽下土而罹災詔龍螭使伏蟠息
憤怒之喧墮曰予悔禍于斯人勞苦雨師以一杯惠我
農師豈不休哉

南山賦

原注寄
張嘉甫

南山巖巖兮其下有人佩玉而握珠刻意魯叟之古經
不習世儒之臆書我頃見之于宛丘貌秀哲而眉疎別
去忽兮幾時面蒼瘠而垂鬚愛德器之老成資巧琢于

璠璵問所與之為誰亦黃稿之仙癯禁八馬之超騫同
芻豆于羣駕時慷慨而長鳴恥賤工之附輿我行世之
多艱三年困兮江湖幸天恩之放還過都梁兮躊躇奉
兩月之周旋越長淮之馳驅屢飲我于山間出翩躚之
兩妹舟師告予以當行具檣櫓于斯須歲方春而寒驕
犯冰雪于野墟雲漫漫兮垂天風飄飄兮切膚揮鬢翳
于宿莽妍柳秀于羣枯泛羽觴之清冷聊覽物以為娛
思佳人兮天未望莫見兮愁予

秋風賦

張子夕坐於堂之南軒有風颯然來自西方感乎人心
異於尋常初披偃乎草木亦泛動乎軒窓張子曰是風
也所以成歲而佐陽者乎時也朱火就謝七月始涼既
導迎于肅殺又介紹于雪霜其中人也萬竅洒然汗澤
為乾纖繺魯縞不勝其單其加物也未敗其形先傷其
情未隕其生先奪其英使之嗒然萎者見于顏色黎然
槁者動于聲鳴吾嘗中夜而聽之澌澌颶颶羣動百蟲

怨泣悲吟感人忡忡者秋之聲且起而望之清明高潔
者秋之容于是庶草効實九穀獻功既獮于野又嘗于
宗感天時之不留念歲律之將窮張子曰吾何為乎戒
裘褐以備嚴冬而已

南征賦

原注贈
張嘉甫

予文窮而莫諱兮顧四方其何適母寧征于江右兮毛
土膏其可食抱朝暮之勝氣兮西山吾以為宅風予帆
于晝日兮予朝發于赤壁標玉壘之下流兮逝蓬飛于

一息迅沮漳而橫入兮滙揚瀾于左蠶嬪吾目而無恨兮濤猛獸以噬綈霽光風于木末兮俟餘波猶未肯平迷失道而問津兮索此下脱三字御于朱明就漁父而陳詞兮

予非湘累之獨醒父告予以不治兮南樵舍而自成破隴畝而溢流兮石險狠而當道豈舟人之肅洽兮艇觸撥而欲倒繫早車于桑本兮予猶可以徒行夷予竈使不得炊兮予猶可以乞隣曰厚土之瀰漫兮予騷騷無以為家雖斯人之可懷兮鳥猶長鳴以歎嗟廣蒲田之

所播植兮歲有秋而登場既狼戾而竭隣兮已獨賦乎
廩倉饌上方之玉盤兮上曰飽斯人之德歲協洽而斲
兮味柔嘉予未得食染予指于鼎兮豈不同此臭味使
持節于十郡兮民樂得此父母顧予懷之倉卒兮謂一
寒之何故雖解衣推食兮曰此小惠汝弗德我我九世
之良醫兮藥神膏而可以破汝腸賦九言而九頓首兮
度百世而足用閱一世之風波兮曰餘皇吾以為歸宿

碧雲賦

塞臨高而延矚悵天邊之碧雲緬不知予何思情全至
兮纊紛懷幽蘭之令姿方揚靈乎上春顧來者之非其
人使暴露乎埃塵我有旨酒與子殷勤終闇莫致實勞
我神白日西馳去故就新發采舒光念當及晨

三酌賦

出公門而偃私酌旨酒于良辰緬再酌而三醻恍如對
乎佳賓畏局促之傷懷聊流暢乎心神懲荒湎乎無算
悠然合乎禮文蕩志文史晤言詩書世醉不足我醒有

餘頤妙物表韜精道樞冥會獨應誰知我娛

人日飲酒賦

歲後七日其名曰人愛此嘉名酌酒懽欣豈木行之始
和生庶彙而施仁又曰人者三才之中將中和之聲布
易嚴殺之餘冬也乃命婦子班坐行觴酌已相祝壽考
無疆有否必泰無窮不通請觀庭下之枯折霜霰消而
敷榮羽蟲感陽而羣嬉况乎雲間之飛鴻于是三酌既
醉喜有所得安局促而不歎悟倚伏之無極

吳故城賦

亂吾舟兮大江夕余濟兮樊口登武昌之故墟弔西門
之衰柳出東郊而南眺訪遺城之培塿嗟頽牆之迤靡
半已平乎耕耨雜谿澗而沮洳稻冉冉而將秀曰是吳王
之故宮兮昔孫仲謀之所以當樊漢之委地羣兇聚而
咏剖偉紫髯之永圖獨穴據乎江右豈無意于雍洛易
虛夸為善守觀其作都于武昌夫何險陋而即安是
為大江之上流兮于備敵焉不繁顧諸將之凡才豈袁

曹之敢班欲身當中原之一面兮事便時利一葦濟乎
濤瀾當是之時兩觀萬雉縹闌應門內擁燕趙之美外
屯貔貅之軍笙磬鐘鼓之喧闐旆車馬之繢紛固已
包蒙川澤震耀山原安知夫千載之後陵谷易位夫何
遺珠與棄玉顧此遺墟之將圯于是與客休于祠宮披
樵蘇之微路嗟牛羊之入室固牲酒之不具與客愀然
三歎而去

予近讀曹植諸小賦雖不能縝密工緻悅可人意而

文氣疎俊風致高遠有漢賦餘韻是可矜尚也因擬之云

柯山集卷二

欽定四庫全書

柯山集卷三

宋 張耒 撰

古樂府歌詞

君家誠易知曲

君家誠易知易知獨難忘西風牆頭吹葉黃蟲絲當戶
理秋光翠屏碧簟生朝涼牀頭蟋蟀見焚香絞綃纈雙
鳳凰上元綠鬢遞耳璫來車去馬官道旁碧雲傳情何

處郎相望玉樹啼寒蟬

于湖曲

有序

蕪湖令寄示溫庭筠湖陰曲其序乃云晉王敦反屯于湖陰帝微行至其營敦夢日遼之覺而追不及故樂府有湖陰曲按晉地志有于湖而無湖陰本記云敦屯于湖又曰帝至于湖陰察營壘而去頃予遊蕪湖問父老湖陰所在皆莫之知也然則帝至于湖當斷爲句乃作于湖曲

以遺之使正其是非云

武昌雲旗蔽天赤夜築于湖鋒洗鎬巴溟騷駿風作蹄
去如滅沒來不斷日圓萬里纏孤壁兵氣如霜已潛釋
蛇矛賤士識天顏玉帳鬢奴落妖魄君不見銅駝陌上
塵沙起鐵騎春來飲灑水浮江天馬是龍兒蹙踏揚州
開帝里王氣高懸五百秋弄兵老濞空白頭石城戰骨
卧秋草更欲君王分上流

襄陽曲

西津折葦鳴策策蟾蜍光入芙蓉白山頭不雨賈船稀
日日門前江水窄將欲烜赫招行人旋起丹樓照長陌
銀屏深蔽玉笙閒自擘新橙飲北客倏離暫合心未果
淚瑩雙眸爲誰墮

寄衣曲

秋風西來入庭樹攀條正念征人苦空窓自織不敢任
鳴機愁寂如鳴艣練成欲裁新絲香抱持含愁叔姑堂
別來不見衣覺窄試比小郎身更長

江南曲

江蒲茅白江水綠江頭花開自幽淑人家晨炊欲熟時
旋去網魚惟所欲往來送租只用船未省泥沙曾汙足
有錢買酒醉隣畔終日數口常在目不學長安貴公卿
每念離心寄朱轂朝遊巖廊暮海島謳人未歸身自到

怨曲二首

白首南朝女愁聽異域歌收兵頡利國飲馬胡盧河毳
布腥羶久穹廬歲月多雕窠城上宿吹笛淚滂沱

祖席駐征橈開帆復信潮隔筵桃葉泣吹管杏花飄船
去鷗飛閣人歸鹿上橋別離惆悵淚江鶯宿紅蕉

壽陽歌

壽陽樓前淮水碧壽陽美女如脂白李郎青鬢照青衫
曾在花前作狂客伯勞睡重花枝晚時許蜻蜓一偷眼
歡娛雖少恨已多纖手紅箋揮翠管淮陽歸來春已暮
夜夜夢魂淮上去欲歌舊曲只添愁畫得雙蛾不能語
有客南來從壽春衆人笑問動精神自從柳別章臺後

攀折風光知幾人已伴春衫辭側帽不怕嬌啼隨意笑
嗟君耿耿獨相思須信多情是年少

勞歌

暑天三月元無雨雲頭不合惟飛土深堂無人午睡餘
欲動身先汗如雨忽憐長街負重民筋骸長殼十石弩
半衲遮背是生涯以力受金飽兒女人家牛馬繫高木
惟恐牛軀犯炎酷天工作民良久艱誰知不如牛馬福

春雨謠

晚雲欲著樹中夜一犁雨老農呼子孫力作莫辭苦風
吹潤土如炊香烹雞為黍餉南岡我知聖人在明堂元
年已是豐年祥

少年行三首

醉弓鶻角蒼雕羽金錯旛竿畫貌虎長驅直踏老上庭
手拔干將斬狂豎歸來解甲見天子金印懸腰封萬戶
自爲大漢上將軍高揖羣公佐明主

人生豈合長貧賤師事黃公曾習戰英雄天子伐匈奴

初拜將軍二十餘黃塵晝飛羽如揷身射單于碎弓甲
從來書生輕武夫坐遣揮毫寫勲業

少年賣珠登主門主家千金惜一身綠韁請罪見天子
尚得君王呼主人鬪雞走馬長安道豪傑驅來奉談笑
漢庭碌碌公與侯畏禍憂誅先白頭

謫官黃州至南頓驛同李從聖叔姪小飲

共飯何草草客來從遠道傾壺得殘酒聊以開懷抱年
將半百兩鬢華謫官憔悴來天涯神理可馮吾道在不

應長遣路人嗟

代贈

洞房飛香作春霧仙人勸酒香中語明眸第二紫雲娘
鶯學歌聲柳如舞蹙眉長歌澧有蘭銀鈎請君春草篇
繁絃高張燭燒夜玉壺未盡參在天春泥雪消淮上路
東風浪頭驚客艤惱公舊事幾夢魂過眼相逢一風雨
黃流清洛上天漢吳山洞庭藏水府謾題詩句寄歸舟
江口風狂那得渡

代嘲

過作拋人去非真我獨知如何立不定却有獨來時

牧牛兒

牧牛兒遠陂牧遠陂牧牛芳草綠兒怒掉鞭牛不觸澗
邊古柳南風清麥深蔽日野田平鳥犍礪角逐春行老
牷卧噍饑不鳴犧兒跳梁沒草去隔林應母時一聲老
翁念兒自携餉出門先上岡頭望日斜風雨濕蓑衣拍
手唱歌尋伴歸遠村放牧風日薄近村牧牛泥水惡珠

璣燕趙兒不知兒生但知牛背樂

贈人三首次韵道鄉

未必蝤蛴如素領故應新月學蛾眉引成密約因言笑試得真情是別離
樽酒且傾寒琥珀淚妝更看薄臙脂北城月落烏啼後便是孤舟腸斷時

醉裏紛紛散別筵醒來客枕一燈前黃茅野岸三更月
春水長亭十里船一點淚憑誰寄與十年香在恨依然
空疑窓外梅花發珠箔青樓若箇邊

可是相逢意便深爲卽巧笑不須金門前一尺春風髻
窓外三更夜雨衾別燕從教燈見渡夜窓惟有月知心
東西芳草渾相似欲望高城何處尋

採蓮子

菡萏香蓮十頃波小姑貪戲採蓮池晚來弄水船頭濕
更脫新裙裹鴨兒

倚聲製曲三首

有序

予自童時即好作文字每于他文雖不能工然

猶能措詞至于倚聲製曲力欲爲之不能出一語傳稱裨諧謀于國則否謀于野則獲杜南陽以謂性質之蔽夫詩曲類也善爲詩不能製曲豈謀野蔽耶爲賦三首

春絲惹恨鬢雲垂媚態愁容半在眉早是思深難語別可堪肌瘦不勝衣眼前有恨景尤速門外無情車載脂自笑不如天上月尊前猶有見郎時

不恨因緣不恨天強持牙板向罇前陽關一曲動山月

別渡千行盈酒船薄命有情今已矣傍人無意亦淒然
願君學取梁間燕秋去春來到妾邊

山未高兮水不深此情此意薄千金今朝酒伴雙垂淚
明夜燈前獨擁衾玉筋異時空見跡塵犀千里亦通心
桃源路絕無人到應許劉郎再訪尋

劉壯輿是是堂歌并序

子劉子構堂于官舍名之曰是是而求子爲詩
予復之曰夫物生之所必有而其爲物彼是相

次而不能定夫一者天下之是非也雖聖人出無如之何昔楚人有莊周者多言而善辯患夫彼是之無窮而物論之不齊也而託之于天賴其言曰吹萬不同而使其自己也周之爲此言自以爲至矣而周固自未離夫萬之一也而曷足以爲是非之定哉雖然如周者亦略稅駕矣劉子乃構堂揭榜而獨以是是非非自任吾將見子吻敝氣殫而言語之戰未已也嘗試爲子

歌堂中之樂而息子之勞庶幾隱几而嗒然者
乎歌曰

讀堂中之書兮以致子之眠飲堂中之酒兮以休子之
言是非雜然于子之耳兮付庭中之嘆蚓與夫木上之
鳴蟬庶幾養生而保和兮窮子之年

獨處愁

高高花飛驚愁顏珠簾晝鎖春風閒少年金鞍照秦地
玉卮雙覆塵埃間花間蝴蝶雙飛舞感觸深心心更苦

昨夜陰雲數尺許連宵變作西窓雨

遠別離

遠別離明當入蜀去酒酣日落客心驚起與僕夫先議
路引車在庭牛在槽桐枝嫋嫋秋風豪別情惆悵氣不
下酒觴醜污麒麟袍緩緩清歌慰幽獨不惜更長更燒
燭贈君髮上古搔頭莫易此心如此玉平生每笑花飛
片東家吹落西家怨但得歸時似別時相知何必長相
見

行路難

人生動與衣食關百年役役誰爲閒四時睡足鞍馬上
去歲錢塘今長安車愁羊腸夜險折船畏人鮓晨驚湍
九州一身恨自惜使我顏色常鮮歡天地一氣成萬象
融即是江結是山再願洪爐瀉融結萬世更無行路難

白紵詞二首效鮑照

搖輕裾曳長袖爲楚舞千萬壽新詞白紵聲按舊朔風
捲地來崢嶸燕雁避霜饑不鳴高堂酒多華燈明

回纖腰出素手髻墮鬢傾釵欲潘爲君歌舞君飲酒歲
云暮矣七澤空湯湯漢汚天北風玉壺之酒樂未終

七夕歌

人間一葉梧桐飄落秋行秋回斗杓神官召集役靈鵠
直渡銀河雲作橋河東美人天帝子機杼年年勞玉指
織成雲霧紫星衣辛苦無歡容不理帝憐獨居無與娛
河西嫁與牽牛夫自從嫁得廢織紝綠鬢雲鬟朝暮梳
貪歡不歸天帝怒謫歸却理來時路但令一歲一相見

七月七日橋邊渡別長會少知奈何却悔從來歡愛多
忽忽萬事說不盡燭龍已駕隨羲和河邊靈官催曉發
令嚴不管輕離別空將淚作雨滂沱淚痕有盡愁無歇
我言織女君莫歎天地無窮會相見猶勝姮娥不嫁人
夜夜孤眠廣寒殿

琉璃瓶歌贈晁二

火維荒茫地軸傾下有積水潛鯢鯨鰲身翻瀾山爲崩
金烏下啄綈龍騰狂鬚奇鬢萬族朋巨神日月雙手擎

夸娥愁思烏戢翎老魚戰死風雨腥長彗下掃千里驚
淺洲一席塊爲城蠻兒夷女竒弁纓大舶映天日百程
怒帆吼風戰飛鵬舟中之人怪眉睛獸肌鳥舌髻翹擰
萬金明珠絡如繩白衣夜明非縞繒以有易無百貨傾
空中開橐光出楹非石非玉色紺青昆吾寶鐵雕春冰
表裏洞徹中虛明宛然而深是爲瓶補陀真人一銖衣
攀膝燕坐花雨飛兜羅寶手親挈携楊枝取露救渴饑
海師跪請願有祇番禹寶市無光輝流傳人間入吾手

包以百襲吳絲厚擇人而歸今予授爛然光輝子文章
清明無垢君肺腸比君之德君勿忘與君同升白玉堂

九江千歲龜歌贈无咎

靈龜千年口不食以背負牀飲其息吾家兩龜豈徒不
食亦不息壽與萬古無終極濟南晁君博物天地通夜
窺牛斗頗似晉司空指我兩龜有名字大龜為九江小

龜號千歲老龍洞庭怒蕩覆堯九州

原注謂半山老人

禹咄嗟

水平流

原注謂迂叟

九江無波拍天浮中有大靈背如丘南

風吹楚澤蓮葉清欲秀有物中作巢一寸立介胄霞衣

仙人鬢如霜飲以南極之光芒丹顱老客不相見飛渡

東海巢

集巢一本作朝

扶桑邇來蟠桃枝有子大如缶浮游輕

于鳥

案此句一本我身輕若蓬

江海一回首青珊瑚柱碧瑤宮水

仙焚香吹作風朝戲蓮葉西暮遊蓮花東秋風蓮子熟

歸去清江國小千歲大九江我久不見之向君案前雙

我謂晁君二物有似我與子國有守龜吾子是爍然天

下之寶器黃金之縢紫瑤匱天王端冕史再拜一逆二

從定大事我身百無用頗似千歲潛深淵不願人間貯
金藉玉享富貴但願寄身江上一葉之秋蓮萬物才不
才用舍不任天寄聲問晁君然不然

大雪歌

老農占田得吉卜一夜北風雪漫屋屋壓欲折君勿悲
隴頭新麥一尺泥泥深麥牢風莫吹明年作餅大如箕
野人食飽官事少莫畏燹縮寒侵肌高堂晨興何所為
門無馬跡人更稀珠樓玉閣互飛動坐見貧屋生光輝

無功及物慚受祿豐穰幸賴天與之棄糧遺粒待雞犬
吾羨何得長烹藜

孫彥古畫風雨山水詩

山深巖高石壁青白日忽變天晦冥黑風驅雲走不停
驚電疾雨來如傾山前雨點大如手山下水湧危槎橫
崩崕古樹老有靈吼怒直與風雲爭枝披葉偃鬪不怯
萬竅却欲藏雷霆鞭驢疾驅者誰子石路嶮澀驢凌兢
目迷心懾愈不及來憩樹下如寒蠅蒼茫直與鬼神接

恍惚不保龍蛇驚平居此樂忽入眼孫家古圖纔可辨
奈何一幅一尺餘欲奪天地之奇變我心愛之良有以
昔苦山行親遇此一生兩足不下堂輸爾朱家貴公子

歲暮歌

北風卷雪送暮冬重雲如山爭塞空百年老樹吼欲折
塲翼不見南飛鴻堂下幽姿亦可悅點綴小樹花玲瓏
老人重裘不能煖永夜惟守深爐紅啾啾寒雀飛不起
饑啄凍土藏枯叢青春欲回水官怒摧拉未使陽和通

天時平分各司一興廢誰得專其雄杜門解轡聊有待
行看馬腳春泥融

光山謠

艤舟淮南望新息天遣清淮限南北崎嶇細路入光山
野色蒼涼秋日白八月穫稻田無水蚱蜢羣飛稻乾死
危橋絕澗聞水聲喧喧汲水爭瓶罌昏昏落日銜遠山
鳥啼車轍未得閒縣公吳生我世舊為我烹羊酤斗酒
燈前醉飽紛就眠五更開門星滿天長年他鄉心悵然

遠途辛勤難具言

用劉夢得三題

春向晚斜日在高樓幽花愁脉脉輕絮去悠悠冉冉三
更雨蕭蕭通夜愁

春已暮把酒送春歸花落鳴禽散草長遊客稀去年堂
上燕故故傍人飛

春竟去白髮感生平流水去不斷夕陽猶有情舊時桃
李月悄悄向人明

柯山集卷三

欽定四庫全書

柯山集卷四

宋 張耒 撰

古樂府歌詞

年年歌

年年西風白露天爛醉村釀秋池原今年杜門不復出
為愛我庭風日寬東西相望兩叢竹正色森森立青玉
朝烟暮雨恣陵奪翠鳳文章終郁郁石榴新栽果不實

下有蕭條冒霜菊人情雖欲薦我酒物意豈願贏君菊
東欄黃葵色貴麗氣壓滿欄香撲較月桂淒涼何足數
蜘蛛網挂蟲窟如東安能卒歲不改芳正自榮枯隨衆木
陶陶吾意方有在瑣瑣眼前安足錄朝來默坐有佳思
病去身輕如脫梏從來北客望江南何用登樓傷遠目

鴟鴞詞

樹頭玄衣郎神與聲復清睡先萬目覺起對殘月星憫
世耽睡昏體穢神不靈招使離衽席啼呼每丁寧幽人

最憐汝未旦起坐聽荒山多嘉樹春盡故園情

園葵歌戲江瞻道兼呈蔡秘校

蔡子園葵非我敵我謹事之如大國主盟召會不敢辭
近忽憑陵有驕色鄒人戰魯固非宜于越入吳誰可測
願君勿以大自驕知小深謀戰須克區區江子似邦妻
我如強魯端能役凌兢螳臂屢見拒我但憐子心難得
近來措置尤小獰何異穿窬時有獲可憐癡將不知兵
請視吾旂豈宜北饑魚貪餌不知釣口雖暫美身遭食

雖然吾亦守疆場
防患猶須謹姦賊
上攀蔡子雖已違
晉楚周旋終有日
下觀江子行邇遠
我進駿駿未知極
嗟予自謂敢忘謙
事有真誠難掩抑
為君聊發一笑端
欲問吾基視斯檄

周氏行

亭亭美人舟上立
周氏女兒年二十
少時嫁得刺船郎
郎身如墨妾如霜
嫁後妍媸誰復比
淚痕不及人前洗
天寒守舵雨中立
風順張帆夜深起
百般辛苦心不惜

妾意私悲鑑中色不如江上兩鷺鷺飛去飛來一雙白
長淮杳杳接天浮八月搗衣南國秋謾說鯉魚能託信
祇應明月見人愁淮邊少年知妾名船頭致酒邀妾傾
賊兒惡少謾調笑妾意視爾鴻毛輕白衣烏帽誰家子
妾一見之心欲死人間會合亦偶然灘下求船忽相值
郎情何似似春風靄靄吹人心自融河中逢單還成阻
潮到蓬山信不通百里同船不同枕妾夢郎時郎正寢
山頭月落郎起歸沙邊潮滿妾船移郎似飛鴻不可畱

妾如斜日水東流鴻飛水去兩不顧千古萬古情悠悠
情悠悠兮何處問倒瀉長淮洗難盡只應化成淮上雲
往來供作淮邊恨

啄木詞

紅錦長條當背垂紫檀槽穩橫朱絲美人亭亭面如雪
纖手當絃金捍撥彈成丁丁啄木聲春林蔽日春晝晴
徘徊深枝穿翠葉玉喙勞時還暫歇深園斷嶺人不知
中有槎枒風雨枝蠹多蟲老飽可樂山靜花深終日啄

雄雌相求飛且鳴高枝礪嘴枝有聲無功忍使饑腸飽
有意却教枯樹青疾彈如歌細如語曲欲終時情更駐
一聲穿樹忽驚飛葉動枝搖不知處

瓦器易石鼓文歌

周綱既季宣王作提劍揮呵天地廓朝來吉日差我馬
夜視雲漢憂民瘼桓桓方召執弓鉞藹藹申韓賜圭爵
北驅獫狁走豺狼南伐淮夷斬鯨鯢明堂車馬走爭先
清廟笙鏞戶載樂岐陽大獮紀功伐石鼓曠曠萬夫鑿

千年兵火變朝市後世紙筆傳冥漠迹荒事遠貴者寡
歎惜風霜日摧剥君誠嗜古更過我易以瓦器尤奇卓
滿盤蒼玉列我前制古形竒異雕琢羲黃已亡巧偽起
采椽土木消純樸何為獲此上古器經歷萬古遭搜掠
寥寥墨翟骨已朽尚有遺風傳隱約又疑晏子矯齊俗
陶土搏泥從儉薄或云古者宗廟器斥棄金玉先誠確
是時此物參鼎俎樽樽土鼓誠為樂嗚呼二物信竒絕
賴有吾徒與提握不然烏瓦與荒碑坐見塵埃就零落

片雪歌

瑤池一片孤飛雪 風急身輕飛不歇 誰將翠袖遠得歸
十斛明珠換與誰 金龜貴客迎將去 玉作輜輶載塵霧
人間不解桃李心 獨與琵琶自相語 主人白頭情不親
朱樓夜鎖梨花春 願同花落寄流水 飄出朱門隨路塵
長恐此生空已矣 從此失身輕薄子 人生但樂兩知心
誰是瓊瑤孰泥滓 淚驚驚中彈花辭樹蝶散蜂驚春日暮
風光不斷流水長 不知片雪今何處

梁父吟

豪俊昔未遇白日無光輝隆中卧龍客長嘯視羣兒九州英雄爭著鞭黃星午夜照中原君看慷慨有心者乃是山東高帝孫老聃赤壁抱馬走紫髯江左空回首世上男兒能幾人眼看袁呂真何有永安受詔堪垂涕手挈庸兒是天意渭上空張復漢旂蜀民已哭歸師至堂堂八陣竟何為長安不見漢官儀鄧艾老翁誇至計譙周鼠子辨興衰梁父吟君聽取擊節高歌為君舞躬耕

貧賤志功名功名入手亡中路逢時兒女各稱雄運去
英雄非歷數梁父吟悲復悲古今人事半如此所以達
士觀如遺龐公可是無心者何事鹿門招不歸

度闊山

度闊山意悠哉秦闊路險行車摧秋雲沉沉天未晚闊
吏正眠闊未開孟嘗逃秦畏秦逐一日歸齊未為速重
扉當道可奈何搔首蒼茫空駐轂主君無言客無計仰
看天星俯相視風鳴木響心自驚咄嗟謾養三千士下

客趨前敢獻誠為君試效晨雞鳴引聲未絕羣雞應軋
軋重門俄徹扃馬嘶人語車輪轉斗柄斜橫夜初半奔
風捷足欲何追虎口脫身非素願孟嘗好士竟何為纔
得雞鳴狗盜兒可憐當日慇懃意輶食分衣竟為誰

天馬歌

風霆冥冥日月蔽帝遣真龍下人世降精神馬育天駒
足躡奔風動千里蕭條寄產大宛城我非爾乘徒爾生
小羌雜種漫羈絛棖上秋風時一鳴萬里名聞漢天子

內府鑄金求驥駒將軍受詔玉闕開靈旂西指宛王死
天馬出城天駟驚塞沙颯颯邊風生執驅校尉再拜馭
護羌使者清途迎騏駒殿下瞻天表天質龍姿自相照
翠旄黃屋兩遷迎玉輶金鞍相炫耀東游封祀被和鑾
甲子北來巡朔邊展才自覺逢時樂致遠不知行路難
物生從類如有神地無遠近終相親君不見莘野磻溪
耕釣叟一朝吐氣佐明君

江南曲

平湖碧玉烟波濶芰荷風起秋香發採蓮女兒紅粉新
舟中笑語隔烟聞高擎紅裙袖雙卷不惜浮萍沾皓腕
爭先採得隱船蓬多少相欺互相問吳兒蕩槳來何事
手指荷花示深意郎指蓮房妾折絲蓮不到頭絲不止
月上潮平四散歸舟輕楫短去如飛斷腸脉脉兩無語
寄情流水傳相思

籠鷹詞

八月獲黍霜野空蒼鷹羽齊初出籠劍翎鈎爪目如電

利吻新淬龍泉鋒少年臂爾平郊去草動人呼躍寒兔
竦身下擊霹靂忙毛逐奔風血濡距爾能搏兔不能食
未飽中腸行復擊主人厭兔爾尚饑一生不快為人役
蒿間黃雀鳴啾啾饑啄野粟心無求賦形雖小技能薄
不受羈縻得自由

拳毛駒歌

北牕掃壁陳圖書殺氣凜凜生坐隅誰將尺素畫駿馬
云是文皇昔日拳毛駒龍鬪虎脊視天地若滅若沒三

萬里皇天產此誰得之虯鬚十八真天子擒王滅寶如

塵埃英氣貫日天為開黃金甲光照天地大白羽箭馳

風雷

原注唐文皇與單雄信挑戰雄信連鐵槊文皇以大白羽射之中其槊出火數尺雄信遁去

真

龍在廄萬馬疾下視四海皆駕駘榛棘昭陵一杯土柏
城六馬莓苔古嗚呼駿馬已埃塵雖有燕昭難再覩

寒鶴詞

寒鶴來時九月天黃粱蒲蕭人刈田啼聲清哀晚紛泊
迭和羣音和且樂朋飛聚噪動百千頸腹如霜雙翅玄

風高日落田中至部隊崩騰鉦鼓沸高林古道榆柳郊
落葉晴霜荆棘地志士朝聞感歲華田家候爾知寒事
壠頭雪消牛挽犁蕩漾春風吹爾歸投寒避暖竟何事
長伴燕鴻南北飛我滯窮城未知返為爾年年悲歲晚
扁舟東下會有期明年見爾長淮岸

寒食歌

東風芳草長寒食春茫茫人家掩門去雞犬自相將原
頭簇簇柳與花行人往來長歎嗟舊墳新塚累累是梨

錢澆酒何人家桑上鳴鳩喚山雨雨腳蕭蕭山日暮歸
來門巷正春寒花底殘紅落無數北里悲啼夜未休清
絃脆管起南樓古今歌笑何時盡芳草白楊春復秋去
年巧笑鞶韁女今年嫁作東家婦綵繩畫柱似當年只
有朱顏不如故百人學仙無一成麻姑不見但聞名萬
斛春醪須痛飲江邊漁父笑人醒

飛螢詞

碧梧含風夏夜清林塘五月初飛螢翠屏玉簾起涼思

一點秋心從此生方池水深溪雨積上下輝輝亂凝碧
幸因簾捲到華堂不畏人驚照瑤席漢宮千門連萬戶
夜夜熒煌暗中度光流太液池上波影落金盤月中露
銀闕蒼蒼玉漏遲年年為爾足愁思長門怨妾不成寐
團扇美人還賦詩避暑風廊人語笑欄下撲來羅扇小
已投幽室自分明更伴殘星碧天曉君不見連昌宮殿
洛陽西破瓦頽垣今古悲荒榛腐草無人迹只有秋來

熠耀飛

齊安行

黃州楚國分三戶葛蔓為城當樓櫓江邊市井數十家
城中平田無一步土岡瘦竹青復黃引水種稻官街旁
客檣朝集暮四散夷言啁哳來湖湘使君麗譙塗堊赭
門狹不能行兩馬滿城鼈噪亂更聲谷風穀穀黃鶴鳴
最愁三伏熱如甑北客十人八九病百年生死向中州
千金莫作齊安遊

一百五歌

山民歲時事莽鹵猶知拜掃一百五平明士女出城闈
黃土岡前列尊俎筠包粉餌蒸野蔬富家烹羊貧薦魚
日暮肩輿踏風雨江鄉人家無憤車揮花飲酒山邊市
醉後歌聲動隣里南人聞歌笑相尋北人聞歌淚滿襟

秋風謠

秋風起秋雲高速山草木如波濤大江蕩潏魚龍逃羲
和奔忙日車逸八柱傾側忍不牢柯山老人揜蓬茅畏
寒理我舊綈袍粗餐在盤有濁醪醉飽高卧從呼號

東臯行

秋雲捲盡秋天清東臯蕭條雞犬聲黃葉吟風聲不平
芙蓉半落更有情歸來僮僕羸馬疲城頭樹暗鳥欲栖
誰家朱樓人夜宿微紅一點簾間燭

正月詞

紅梢一夜櫻桃雨簾捲曉晴鶗鴂語簾旌細浪滾東風
迎得春歸與為主玉手嬌慵添繡線欄下葛蒲近相見
雲屏曉睡翠翹橫樓上寒時正五更

二月詞

滾風畫幕長廊靜簾下人眠初日永嚶嚶不動採花蜂
夜來露重薔薇冷芳草長時寒食天紅牆低處見鞶韁
人家無事雞犬閒日暮芳郊畱醉眠

饑鳥詞

北風夜雨鳥翅濕依飛野畦啄遺粒啄食不飽還畏人
嗚呼隔壠自求羣我行陳宋經大澤田荒生茅不種麥
空腸待飽明年禾鴉鴉爾饑獨奈何

苦寒行二首

淮南苦寒不可度
積雪連山風倒樹
長淮凍絕魚龍愁
哀鴻傍人飛不去
雪中寒日無暖光
六龍瑟縮不肯驟
老憊孤舟且復止
堅冰三尺厚于牆

茫茫楚鄉仲冬月
白屋無烟飛走絕
空林號風冰斷枝
長淮無人冰照雪
凍埋釣艇不復漁
南羨未爵淮中魚
要須下擘澄湫水
割取寒蛟烹腹腴

春詞

寶刀裁花碎羅縠帶臘圓紅黃染粟枝頭幾日即花開
世上人情何太速東風未轉北風嚴返挂銅鈎不上簾
莫怪蛾眉呵素指層簷冰碧玉纖纖

宮詞效王建五首

夜來霜重著欄干玉殿無塵玉甃寒日日君王罷朝早
禁廷無事一冬閒

簾外微明燭下妝殿門放鑰待君王玉階地冷羅鞋薄
衆裏偷身倚御牀

昨夜新霜滿玉堦
初冬處處火爐開
中官逐院傳宣賜
南國諸侯進橘來

玉墀夜色晝昏昏
催放朝班散侍臣
隨駕上樓同看雪
萬重宮殿一時新

蓮燭千枝夜宴遲
君王索筆寫新詩
宮人和得爭先進
偏愛宋家兄弟詞

旱謠

七月不雨井水渾
孤城烈日風楊塵
楚天萬里無纖雲

旱氣塞空日晝昏土龍蜥蜴竟無神田中水車聲相聞
努力踏車莫厭勤但憂水勢傷禾根道傍執送者何人
稻塍爭水殺厥隣五湖七澤水不貧正賴老龍一屈伸

貽潘邠老

有序

予居柯山西潘邠老居東九月十一日往過之
逕蔬圃坐修誠堂竹間歸飲于龜蟬之間殊有
佳興作雜言貽之

有屋可以讀書有竹可以忘憂採庭之菊香有餘烹園

之蔬甘且柔賢哉二子又復何求鬼不爾責人不爾仇
沽酒可飲江魚可羞又安用列鼎食珍佩印封侯我居
柯西相隔一里可以杖屨朝往而夕遊必未厭我乞醯
與借馬但只恐勤君赤腳與露頭不然將吾顏子簞食
瓢飲屢空之樂又欲翻董生清明玉杯繁露之春秋

醉中雜言

老人攀花復藉草春力著人如醉倒未容作計試畱春
東風已與人俱老東君惜春不惜花千紅萬紫委泥沙

已教白日張錦繡更欲平地興雲霞我欲呼客無酒肉
摘花挿頭悲髮禿安得釀酒萬甕屠千羊花間醉飽踏

春陽



柯山集卷四

欽定四庫全書

集部

柯山集卷五至八

詳校官庶吉士臣汪彥博

檢討臣何思鈞覆勘

總校官進士臣程嘉謨

校對官學錄臣常循

膳錄監生臣高憲曾

欽定四庫全書

柯山集卷五

宋 張耒 撰

古樂府歌詞

詣山祭淮詞二首

迎神

木棖棖兮蒼山巔高湫重深兮其下九淵東風歌兮春
水舞庭肅肅兮神來下神來下兮翠帷舉谷冥冥兮春

山雨雨三休兮神三燕游雲高兮見極浦安我舟楫兮
君不怒水濱之人兮苦思君葛蒲生兮楊柳春解君旂
兮醉君御聊樂一日兮莫予棄

送神

楚巫醉兮君不留春風起兮木蘭舟弭余楫兮飲君酒
君既不顧兮駕龍以出遊凌九江兮勒滄海萬龍舞兮
百靈會君孔樂兮我思君望君故居兮其上片雲水淪
淪兮石碌碌空祠草長兮風雨入君屋山中春兮鳥鳴

悲明月皎皎兮中夜來

惠別

洞簫奏兮瑤瑟御日不足兮纏以夜吾寧獨此湛樂兮
喜予美之宜修披浮雲出明月兮揮衆星不與謀既成
言以命予兮顧永子之光明豈獨謂不然兮託東風以
惠聲嗟言獨何容易兮有傾身者鬼神中懷著而必見
兮卷蘭舌而交信予雖不執子明燭兮光輝其舍予兩
相審者不媒兮予旣獲予于鼻息舒予聲以歌兮鳳凰

將聞而振羽結子佩而起舞兮星斗視子而上下獨翩
翩其不可留兮君之居可知而不可得春水渙渙兮予
獨飲君河之曲鳥鳴羣飛兮其下芳草柳舒舒其可攬
結兮桃李始就其膏沐行者懷兮別者思酌君酒兮壽
君以不衰撫君舟之悠然兮將浩渺以浮航三江震澤
兮舟師告憊而一息引日星之煌煌兮吾獨望子于南
極想子其下兮鼓聖濤而鞭蛟龍使宓妃不敢巧笑兮
皇英斂衽而來從南風之來兮入予裾悅余心獨條暢

而清婉兮曰是為故人之風

憇魃 并序

壽安夏旱麥且死民憂之無所不禱雲既興輒
有大風擊去之間而雨塞不辨人物類有物為
之者張子攷于詩以為旱之神曰魃意者魃為
之乎作憇魃詞

帝治下土兮遠于民撫御萬方兮周無垠物類億千兮
莽叢叢出入日月兮運星辰廣必有容兮潛姦昏不上

憇兮帝曷聞歲庚申兮斗建己旬逾十兮雨不施秀者
燃兮實者悴麥莽莽兮不出塊舊穀既沒兮待新以食
奪其所望兮民憂以惑捨未而兵兮奪攘剽賊急不知
慮兮求生頃刻民幸帝兮詔雲師氣朝升兮斂陽暉孰
鼓風兮震川岳上者揚兮旁者剝雲雖仁兮不得施野
童童兮草木摧孰揚塵兮蔽朝日紛霏霏兮冒萬物昏
迷蒙兮浩恍惚瞭者瞀兮失南北瘞根莖兮腐葩實世
慘錯兮澤蓬崕霍霍然兮侵萬室飄雨塵兮以旦以夕

民曰誰為兮尸是有物其名曰魅兮旱是司惡潤忌澤
兮盜陽威淫視槁木兮疾華滋憎飽妬飫兮幸民饑亢
不伏兮風以助之慘懷柔茂兮塵埃是吹來炎火兮爛
煌煌馭回祿兮驂畢方朱旛旂兮絳帷裳坦無畏兮樂
洋洋朋疫癘兮友疾殃徒甚劇兮黨甚強慢帝威兮分
害戕竊祠禱兮傲驅攘民賴帝仁兮以衣以食上帝孔
昭兮憇無禍責幸帝震怒兮降魅罪疾無俾在世兮幽
沉深溺雷伐鼓兮電揚旂雨卷壑兮雲張帷泛游澤兮

湛甘滋充犒瘠兮奮枯萎禾黍茂兮蔬果肥歲既登兮
民飽嬉康帝民兮恩甚思幽斯厯兮宥無期

敘雨

有序

福昌之民有禱旱于西山者取山之泉一勺祠
之不數日而雨邑民言旱歲取水以祠輒應且
其取之者非特福昌也張子神之作歌以揚之
西山之泉兮冽以清淳注萬古兮無虧盈應龍蟠守兮
謹防扃有神司之兮帥羣靈神君曷處兮山之穹雲郭

霧闕兮都邃宮。騰駕逸景兮馭清風。上友仙聖兮佑帝
躬。惟今之旱兮非神曷憇。家無餘糧兮麥不庇雨土飄
塵揚兮迷行錯步。懸威孔張兮熾莫予禦。挹水一勺兮
薦羔豚。曷求于水兮神實憑土。有蔬兮林有實。笔馨香
兮蘊芳鬱。神我饗兮臨我堂。酌芝醑兮御椒漿。巫甚祇
兮時甚良哀。我疾兮降我祥。神君仁兮念下民。撫民災
兮號帝閽。帝念神君兮詔雨官叱馭六龍兮奮互飛騫。
掣飛電兮鼓雷震。俾霏爾澤兮正無限山靈川怪兮更

騰奔角毛羽鬱兮爛鱗鱗前幢後旆兮玄雙輪椎轂喧
呵兮鼈乾坤神龍九鬱兮雜蛟鯢瞠眼飛涎兮鼈齧
伏潛羲和兮止星辰一洒萬里兮傾河津妖風失威兮
斂以奔駕濡厥裳兮伏以蹲槁蘇焦澤兮息惔焚優渥
潤沃兮無涯垠菽麌說說兮奮裳紳秋種既即兮農則
勤既足而止兮披霧晉朝陽清明兮飲游塵功成不居
兮駕歸雲空山寥寥兮夜無聞靈泉幽幽兮湛淵淪竭
誠莫報兮仁哉君

友山

張子官于福昌塊然獨居無與為友賓客不至遺朋失舊經時閉門終日鉗口出無與遊居無與就誰同我食誰酌我酒歸守妻孥出對廝走駕言出遊田童野叟氣否莫交情包不剖塞聰蔽明盤足袖手披書閱簡眩目疲肘厭然成痼不可針灸于是張子滌慮除煩披庭掃堂枕手而眠恍若有遇有神降焉曰我實哀汝獨無友朋我有教告子乎我聽凡世之人百愚一賢古昔所歎

非獨今然得賢與朋善固無儻賢不可得將愚與比友
賢實難幸然後值不幸友愚與無孰利謔笑傾辟韜情
晦實測心獻計因隙投策口是腹非面歌背泣友若此
者實繁孔多曷若不見目清耳和我復告子真友之實
爾遵我言友胡有竭人物雖殊可友同焉賜爾以友其
名曰山居汝左右在汝北焉端不汝去澹兮絕言春麗
夏繁秋疎冬瘦霞霧融明風馳雨驟孤楫橫奔屯巧
鏤傲岸軒昂清華潤秀對食臨眠排堂入牖効技汝前

雖勞不疚山有佳泉多灌爾園厯石懸空泠泠清澈如
聞妙音濯煩浴垢不猶愈乎卑議庸讀過耳增憇入心
善煩者乎山有修竹汝園是植靜麗明鮮端虛正直如
彼正人揚言發色微風散碧宵月鏤白不猶愈乎市兒
塵顏歌眉鼓吻佞笑浮言工為媚悅善佞曲拳者乎山
有喬木聳立而峙端無媚姿若對正士障雨蔽暎千人
所芘微飈披拂吹奏竽籟不猶愈乎蠕蠕鼠輩女黠兒
嬌奴趨妾拜者乎山有好鳥清喉麗羽引嘯長鳴羣呼

迭語夜管風絃哀簧怨柱不猶愈乎巷歌里舞促縮跳
梁顛妖淫汚父子不施棄禮忘數者乎如前實繁言胡
可殫汝與之樂右攀左援曷為子子寤寐嗟歎張子再
拜受言永懷解累亡憂心通志閑高山巖巖流水潺潺
竹茂木翹鳥鳴琅然如前夷齊而後閔顏吾何為乎浩
然其間

種菊

有序

張子病目眩而視昏醫有勸食菊者春夏食葉

秋冬食花張子以為菊華于草木變衰之際而

又功足以禦疾類有德君子因求而植諸庭焉

何馨香之芬敷兮昌綠葉而繁莖是其名為菊兮爰植
予之中庭性清平而不躁兮味甘美而充烹當秋露之
慘淒兮舒煌煌之華英色正而麗兮氣芬以清純靜秀
潔兮族茂羣榮採食以時兮天和以寧穎輕竅達兮瞳
子清明散敗流濁兮風宣滯行仙聖所餌兮屏除臭腥
久嗜不廢兮將延爾齡嗟予生兮蹇薄煩冥憂饑畏寒

兮微祿以生終曷歸兮山林是營膏梁鼎食兮方丈縱
橫炙熊之蹯兮龍醢羊羹彼得有命兮吾奚爾榮惟茲
佳菊兮野實以生採擷咀食兮薦俎盈盤求之孔易兮
世焉莫爭我有久疾兮壅塞煩惱支節堅痺兮氣閼于
元憊不能支兮外壅中乾疥癬得志兮蟻蜎伏蟠餐華
秋冬兮食葉春夏集新易故兮爾功是假寧康我軀兮
骨節堅良產和剔戾兮其樂洋洋反華于玄兮易灑以
強忘生絕俗兮深潛遠藏驂駕雲霧兮呼吸太陽招友

彭咸兮御風以翔吁嗟此菊兮吾于爾望

逐蛇有序

福昌官居北負山為堂有大蛇穴堂北時下飲
堂南水中人皆以為神見者不敢逐或禱祠焉
張子曰是吾居也蛇安得而處之且蛇爾安有
所謂神者作此逐之

嗟堯之時兮大水滂橫潰四海兮包陵岡蕩流湧汨兮
周無防龍騰蛇奔兮嬉以狂腥鱗頑鬪兮更披猖城居

穴處兮亂厥常頽蟲糾結兮肆害戕陸盤淵據兮傲不
臧朋屯黨集兮蕃以昌穿穴噬齧兮民盡傷下民既病
兮帝弗康黃熊幽殛兮羽山陽乃命伯禹兮行四方秉
高趨卑兮陵復航鑿山疏源兮導河江萬水下走兮來
洋洋經畫九野兮興農桑驅龍放蛇兮屏諸荒焚山燎
野兮無遺芒野巢窟居兮保厥疆敢有弗率兮斷爾吭
伯益作志兮稽妖祥帝虞耄勤兮黜子商天授神禹兮
夏是王九牧作貢兮金鑑錠大冶鼓鑄兮騰精鎚巖巖

九鼎峙且剛奇形詭質兮走與翔鱗毛羽裸兮兮雜短
長求情抉態兮幽微彰制馭百怪兮嚴紀綱獸蟲人鬼
兮安其鄉殊宮別域兮異存亡曷為茲蛇兮宅我居妖
頑堅老兮傲驅除深潛居此兮坦無虞下飲我沼兮稍
林株朱眸丹舌兮玄鱗膚恍惚遽速兮疑有無居者畏
避兮行者徐險奪我圃兮駭我徒盜竊祭禱兮欺羣愚
我咨爾蛇兮潛山而穴野隣蟠遠伏兮與人乎異舍冬
居夏游兮時以行食爾之食兮朋爾朋僭亂我居兮常

失經叛棄爾守兮帝有刑胡昏與頑兮居以寧自為不
寧兮邀割烹荒戾天理兮悖聖程我宥爾愆兮逐爾行
亟舍故處兮遐以征南山之幽兮雲霧冥草木蒼蔚兮
嶮不平爾徒實繁兮食惟爾盈捕取不至兮居無與爭
汝生孔遂兮壽綿爾齡物違其常兮禍之所集豐狐晝
游兮冬裘以白龜厭淵處兮吉凶是卜虎不畏人兮皮
包戈戟矜險恃孽兮其終鮮克我言孔昭兮語汝以理
日吉時良兮汝遄以逝

登高

懷不展兮居無聊兮默諱語兮浩長謠寫我心兮登彼高
陟萬仞兮捫九霄命清風兮披浮雲瞰四荒兮視天垠
大海蕩潏兮潛龍鯢吐吞日月兮制明昏醞釀元氣兮
函星辰羽載四海兮芥浮坤四岳列峙兮嵩中蹲牽連
脈絡兮子復孫草蔓木布兮升降如朋障南蔽北兮東
散西分如掌列塊兮盤羅豆蹲黃流中貫兮發源崑崙
東驚大海兮縈如繚紳南方炎炎兮火之所宅朱鳥屹

峙兮丹膺絳翻騫飛以翔兮輝煌爛赫從擁萬羽兮紛
羅羽翼煌煌尊嚴兮有斗在北升降玉都兮運量帝側
呼吸陰陽兮秉持禍福真仙逍遙兮澹不可挹西有王
母兮戴勝穴居壽歷萬古兮忘終泯初超遼恍惚兮獨
與道俱驂友日月兮羣靈走趨既又左而東顧兮觀大
明之始生震沸九淵兮麗天升精披攘羣陰兮重幽昭
明有神司馭兮朱裳絳纓呼造物以致問兮吾將故乎
太初彼天地其孰始兮日與月其代除四荒漫其何極

兮人胡為而中居火何為而南宅兮水孰使其在北安
知東之主生兮西配刑而主殺斗建寅而氣分兮疇為
四時之消息世徒知其已然兮遂推類而立說彼厥初
其誰造兮孰布施而殊別抑其不得不然兮或者私智
之所設將忽然而自爾兮遂已成而不可絕造物為余
究察兮曰此曷可以言陳而意悉彼混沌之一氣兮吾
不知誰合而為一忽洞達而兩分兮夫亦安知其誰闢
爰升清而降濁兮水赴陰而火陽東升氣而敷生兮西

或成而害戕强名之曰自然兮曷足以究其必至謂不得不然者愈疎兮尚妄取于私智莊周誕而妄推兮夏革愚而臆對世號予曰造物兮予亦曷有所主尸苟待予而後造兮彼造予者復誰姑置之而勿校兮任萬物之自成游小智于太初兮何異夏蟲之語冰曠任之而勿疑兮萬里曾而一平夫何造物者開予兮神飄飄而不居我將赴而遠遊兮招神聖以為徒騰九螭之奔輪兮追飛電而攬奔風周萬里于一息兮堂西極而有九

區叩玉闕之九關兮覲上帝于絳都酌瑤尊之芳酒兮招赤松而友彭祖既錫我以難老兮黜嗜慾而襲靈虛爰脩我以秘藥兮合千簫而吹萬竽樂吾心之洋洋兮舒五體之輿輿降復還于我室兮聊彌日而一娛

子由先生示東坡公所和陶靖節歸去來詞及侍郎先生之作命之同賦未輒自憫其仕之不偶又以弔東坡先生之亡終有以自廣也

歸去來兮行世不偶予曷歸其出無所為喜兮舍去而

何悲歎一世之無與兮古之人逝莫追求不疚于子義
兮又奚恤餘子之是非彼好惡之罔極兮或顛倒其裳
衣顧吾涉之已深兮愧哲人之見微吾歸甚安無所事
奔既守吾室又杜吾門一氣乳神于中夜存納至和于
靈根兮挹天醴于玄尊既充溢于幽闕兮亦粹然而見
顏徃有坎而茲夷兮昔或危而今安將從化人于西域
兮面藏吏于函關將以一世為芻狗兮廢興與吾厭觀
彼福禍之一源兮必茲出而茲還彼自以為無隙兮何

異夫石柳之宋桓歸去來兮吾悲夫斯人不返兮豈招
仙聖與之游昔惠我以好音忽遠去而莫求予曷異于
世人兮初為哽塞而增憂彼錢鑄則深藏兮盍視夫已
懇之田疇萬古芸芸共逝一舟半夜而失旦號其丘畏
達觀之謂予涕已泣而不流悟榮名之取憎兮善斯人
之獲休已矣乎萬物之作各其時吾獨與時而去留豈
或能力而違之既往莫或追來者尚可期蓋雨暝之在
天豈吾稼之不籽彼蜀雄之必傳作猶愧于書詩嗟身

屈而道伸于斯人兮曷疑

哭下殮

下殮者何吾兒也兒生慧淑父母有所戒輒絕
不為性仁不傷物處其曹恂恂也年七歲得驚
疾醫之不得其方而死作此以哭之

醫之不得其方耶抑其命有短長耶獨爾能使吾悲若此
耶抑為父者皆愛其子耶蒼顰夷頰秀眉清目今其存
亡其猶有鬼也使無物則吾復何思其尚有知也則夫

荒屋野寺風霜雨露食息誰汝視也

柯山集卷五